

摘藻堂四庫全書薈要

集部

欽定四庫全書薈要

集部

松雪齋集卷三

四

詳校官助教臣謝登雋



欽定四庫全書薈要卷一萬六千二百八十七

集部

松雪齋集卷三

元 趙孟頫 撰

五言古詩

次韻周公謹見贈

池魚思故淵
檻獸念舊藪
官曹困窘束
郊入常盡酉
簡書督期會
何用傳不朽
十年從世故
塵土滿衣袖
歸來忽相見
忘此離別久
緬懷德翁隱
坐羨沮溺偶
新詩使

我和曠里忘已醜平生知我者頗亦似公否山林期晚
歲鷄黍共尊酒却笑桓公言淒然漢南柳

清勝池上偶成

竹色雨餘碧蟬聲風際清方池含綠水中有纖鱗行浮
沉各異態亦足悅吾情欣賞方自茲庶復得此生

重用韻

孤花色更媚密竹氣自清懷彼橘中樂偶茲池上行榮
華或傷性賞靜可怡情坐久不成起待得月華生

贈韓定叟

蕭蕭晚雨細淅淅幽叢響
爐溫動餘馥研潤生新賞
方欣情話款復此丘園想
即事可忘憂胡寧困塵鞅

次韻韓定叟留別

季冬寒氣結晨興懍嚴霜
越江不可涉欲涉恨無梁
飄飄客衣薄烈烈北風涼
會少別何多令人心靡忘
相去數百里東西渺相望
豈無琴與書撫心獨彷徨
鬢毛各已蒼目視亦茫茫
中年別親友作惡固其常
安得傳羽

翼與子俱飛翔

擬古

長夜何漫漫寒鷄胡不鳴我行在中野霜露上沾纓虎
豹夾路啼熊羆復縱橫我前鬼長嘯我後啼鼯鼯四顧
寂無人北斗高且明天道誠幽遠吾心空屏營

哀鮮于伯幾

生別有再逢死別終古隔君死已五年追痛猶一日我
生大江南君長淮水北憶昨聞令名官舍始相識我方

二十餘君髮黑如漆契合無間言一見同宿昔春遊每
拏舟夜坐常促席氣豪聲若鐘意憤髯屢戟談諧雜叫
嘯議論造精覈魏煌商鼎制駟駿漢馬式奇文既同賞
疑義或共析錦囊衰玉軸妙絕晉唐蹟粲然極炫曜觀
者咸辟易非君有精鑒疇能萃奇物最後得玉鈎瑯琢
螭盤屈握手傳玩餘歡喜見顏色刻意學古書池水欲
盡黑書記往來間彼此各有得我時學鍾法寫君先墓
石江南君所樂地氣苦下濕安知從事衫竟卒奉常職

至今屏障間不忍覩遺墨淒涼方井路松竹蔭真宅乾
坤清氣少人物世罕覲緋袍儼畫像對之淚沾臆宇宙
一何悠悲酸豈終極

酬潘提舉

卧病六十日憤憤無一欣時取古書讀那復能知新客
從遼東來一見意自親高談極虛無微言合道真遠宦
萬里外飄然絕埃塵歸來如老鶴笑視世間人胡為肯
顧我扁舟雪溪濱白髮我已老青雲子當伸京師人物

圓子往無逡巡而我慵惰久棲遲甘隱淪

新秋

夜久不能寐坐來秋意濃
露涼催蟋蟀月白澹芙蓉
漸覺練衣薄欲將紈扇慵

秋日言懷

暑退草木蘇綠陰秋更繁
玄蟬寂無聲蜚蛭已復喧
四序有代謝人事何足言
塵冠久不彈散髮坐前軒
俛仰歲云暮遲此負朝暄

送姚子敬教授紹興

我友子姚子風流如晉人白眼視四海清言無一塵結
交三十年每見意自新皎皎白駒瘦華髮無緇磷此行
度浙水言采會稽芹會稽山水勝王謝雅所欣亦有支
許儔迭遞為主賓子往訪遺跡棹船鏡湖濱狂客雖已
去高情自清真以子絕代才數賢可比倫登山復臨水
嘯歌且怡神時時書寄我用慰情相親

述懷

我性真且率不知恒怒嗔俯仰欲從俗夏畦同苦辛以
此甘棄置築屋龜溪濱西與長松友東將修竹鄰桃李
粗羅列梅柳亦清新漸與市朝遠頗覺漁樵親自謂獨
往意白首無緇磷安知永嘉惠再踏京華塵京華人所
慕宜富不宜貧嚴鄭不可作茲懷向誰陳

慶壽僧舍即事

白雨映青松蕭颯灑朱閣稍覺暑氣消微涼度疎箔客
居秋寺古心跡俱寂寞夕蟲鳴階砌孤螢炯叢薄展轉

懷故鄉時聞風鳴鐸

送李仲淵同知眉州

西風吹客衣，秋日明遠樹。
蕭蕭班馬鳴，念子明當去。
人生貴適意，要津何必據。
佐州亦不惡，足展經濟具。
峨眉山川秀，文俗盛如故。
喜子過我樂，增我羈旅慮。
怱怱萬里別，益歎相見暮。
此心如天河，隨子西南注。

幽獨二首

閒居無與娛，幽獨欣有得。
松翁善嘯歌，花女美顏色。
人

生亦何為耳目皆幻適我今未半百鬢髮早已白牙齒
復動搖行當為去客且盡須臾歡忘言坐苔石

獨坐不自聊披草尋微逕夕陽在高林籬落有餘映依
依增遠想歷歷生晚聽涼蟬軋鳴箏候蟲擊清磬大小
皆有從雄雌各相應沈吟復躊躇忽覺西山暝

允懷齋

安西皇
甫先輩

小齋深且明中有萬卷書齋中古君子寸田自耘鋤人
生萬善具政當復其初操存貴勿忘道積乃有餘時復

南窗下靜看雲卷舒

送文章甫陝西都事

籍甚潞公孫去為西省客矯矯國士風
婉婉幕中畫涇渭寒有聲終華秋更碧
聊因佐理餘題詩寄來驛

美人隔秋水

美人隔秋水咫尺若千里可望不可言
相思何時已庭樹多落葉日夕秋風起
我今年已衰素髮擁兩耳回思少年時
容顏若桃李美人何當來一笑懷抱洗未見令

我思既見胡不喜

贈季明道尊師

我遊皆意行仙館欣有遇麻衣皓如雪蓬鬚颯以素懸
知有道者一見乃如故行當還山中清飈送雲馭蒼松
無凡聲石局有生路風雷坐可致龍虎儼訶護空令塵
中人矯首企煙霧

雲林山中

松風太古聲欲寫不可狀仰觀空翠滴俯聽潮音壯豈

惟塵慮滌亦覺神情王平生獨往意老矣天所放翳翳
林竹間山鳥時一唱俗氛雖云遠勿起清淨障

九日當採菊登高古相傳我今值佳節燕坐雲林顛亦
有巖間花青蕊露華鮮采采服九英飲水可長年况茲
霜稻熟刈我山下田一飽無復事了我粥飯禪

題括蒼山成德隱玄洞天

洞天在何許乃近在人間神仙亦人耳仙成厭塵寰冥
冥隱玄洞峩峩括蒼山卿雲時翦勃赤鳥昔飛翻緬懷

葛玄翁一往不復還餐霞弄明月解纓濯潺湲青芝伺
時生綠蘿共誰攀服食去道遠孤坐亦非丹清歌極窈
渺朱書勒孱顏千年有白鶴飛來啓玄關

題先天觀

對此山水詠使人塵慮消况茲構真館燕坐遠煩囂青
林蔭戶牖素雲冠山椒松風和澗泉雜佩響瓊瑤焚香
玉女降長齋百靈朝仙道本不遠清都亦非遙自嗟衰
暮年頗費猿鶴招安得生羽翰從子以消遙

周南翁悠然閣

青山與高人一見如有約悠然相莫逆無語心自樂凌
虛步丹梯攬秀有高閣應同九臯鶴翱翔在寥廓

夏日即事呈六兄

下簾却畏日開軒納清風雖無政事關亦見好惡公此
心如白壁聊與世容容有兄遠方來一笑杯酒同我雖
不解飲預恐尊中空呼兒更往沽勿使歡意窮

送謝伯琰

太史院
都事

纂纂棗實繁嘒嘒蟬聲稠炎暑尚爾熾西風猶未秋憐
子觸熱行不憚道里修棧閣天下險錦城西南陬過家
因上冢聖恩賁林丘鞍馬雖驅馳於義不可留子材瑚
璉器用世美且周明時方任賢驛程難久遊去去早言
還庶解離別憂

偶記舊詩一首

在德清別業時作

春情浩無端野興欣有矚山光豔桃李澗影寫松竹古
來巖穴士白駒在空谷幽鳥何處來啼破林烟綠

遊幻住菴

雨後溪水溢黃流行地中輕舟何迅邁沿波兼順風碧
蘆幹始長柔桑葉已空瞬息抵山曲窈窕微徑通青林
夾道周流泉響幽藂多慚衆衲子前路相逢禪居新
結構斧斤未輟工雙閣出塵躋六窗自玲瓏久矣厭城
市飄如脫樊籠妙香清鼻觀新鶯驚耳聾汲水插山花
開牖納松風經聲出廊廡寂然聞鼓鐘蔬食欣一飽亦
與膏粱同緬懷老尊宿燕坐毗盧峰塵緣苦未斷無由

往相從一宿返歸棹迴望但青蔥

清河道中

揚舲清河流開篷素秋曉爛斑被厓花委蛇順流藻天
清去鴈高野濶行人小故園歸有期客愁淨如掃

夏至

夏至午之半一陰已復生堅冰亦馴至顧起一朝成萬
物方茂悅安知有雕零君子感其微慟哭幾失聲

庭前松

手種庭前松於今二十年清風時過之我琴不須絃高
標傲歲晚秀色凝空烟有懷貞白君世豈知其玄

七月六日承貞居先生遠寄周鍾銑間有文象
鳧之形則考工記所謂鳧氏為鍾者也擊之與
夷則合而是日又適立秋古物之來豈偶然哉
輒成小詩拜貺之辱

故人賞我趣遺我鳧氏鍾制與周禮合試叩聲春容是
日新秋節夷則還為宮懸之西楣下浮磬儼在東金石

互相應間以絲與桐八音雖未備古樂將無同鼎尊鐸
解卣羅列見古風揖讓於其間令我懷周公作詩報嘉
貺庶以開羣聾

間居

荒庭蕪弗治翳翳草與筠池魚出娛客林鳥來依人間
居意自足何者為戚欣況於黃卷間時與聖賢親

病中春寒

仲春尚寒氣林花無豔滋弊裘擁衰疾風雨何淒其始

雷發東隅霽牖陽光披微風草際動落英池面移幽禽
變圓吭遊魚揚細鬣我病自此愈泛舟溪水湄小輿指
南蓋短筇問東毗機心不復有高蹈農與羲

松澗詩贈丁師善

青松上參天下有幽澗泉高人居其間萬慮不至前讀
書得妙趣視世等浮煙胡為舍此去杖策走日邊要當
陳忠益民瘼會有痊却歸弄泉石靜聽松風眠

興中府某氏見山樓

東北有高樓迢遞數十尺朝霞映窗牖浮雲來几席莽
蒼一望間峯嶺千峰碧青山何處無所見多迫近偉哉
醫無閭周禮載簡冊我雖身未到心想已可索但惜道
里賒處地遠且僻嘉彼樓居子不受世故役愛山如愛
客相對樂晨夕應笑平地人塵埃坐充斥

贈恢上人

晨坐古松下有僧來叩扉松花落金粉細細點春衣折
松當麈尾相對澹忘機湯休不可作政索解人稀

露坐

露坐夜將半澹然無所為草根蟲鳴歇松梢螢度遲城
市多塵雜令人心不怡茲丘亦可老已與白雲期

題黃華為其父寫真

仙人紫霞衣獨坐古松間玉色映流水不動如丘山平
生黃華老得意每相關九原如可作與君相對閑

題先賢張公十詠圖

張先子
野之父

吳興瀟灑郡自古富人物溪山映亭榭尊俎照華髮當

時盍簪地蓁莽久蕪沒空餘詩語工不共芳草歇撫卷
想勝風冠佩其敢忽先民不可見惆悵至明發

犀浦遐觀詩

男子四方志蜀都天下奇李侯并門豪杖節鎮坤維愛
此雪山雄卜宅犀浦湄錦城既云樂焉用還家為遺像
開生面清風凜英姿應同武侯廟人懷千古思

吳俊卿義塾

禮義生富足為富或不仁誰能如吳君捐已以惠人開

塾延師儒聚書教比鄰豈徒名譽美要使風俗淳人物
方渺然作養當及辰文章雖致身經術乃新民宣公相
業著輔子理學醇二賢鄉先正千載德不泯吳君真盛
舉勉哉繼前塵何當襲春服從子語水濱

寄題杜尊師白雲菴瓊秀亭

白雲從何來乃在計籌山山中古仙伯翱翔白雲間城
市多躑塵山林幽且閑結屋松竹裏開窗泉石邊清齋
誦道德焚香降神仙俯仰皆自得洗心游泰玄稅駕往

從之規買山下田藝藥掃白髮栽桃映紅顏庶幾林下
意期了區中緣丹成從師去笑拍洪崖肩

瓊山發天秀珠泉表地靈柔蕙吐丹葩喬林標絳英酌
醴吸冲和汲澗漱甘清石門開洞府木龍走巖扃清飈
一時至四座浮幽馨閨風何必遠世塵空自冥從遊當
有期淹留詎無成左手擷紫芝右手采黃菁振衣陟崇
岡遐觀散神情長嘯煙霧裏滿空鸞鶴聲

七言古詩

楊堅州治水歌

秋水至今大河溢金隄決兮流漂疾田疇汨兮為民憂
魚鼈肆兮地上游誰能治水兮徵楊侯具畚鍤兮萬人
聚勢悍急兮不可以禦問河伯兮何所怒歲不登兮民
且窶侯精誠兮感神明赤蛇蜿蜒兮昭厥靈奠桂酒兮
薦芳馨神攸歆兮隄防成水復故道兮民載寧天子聖
兮地道平萬歲千秋兮揚頌聲

題錢舜舉著色梨花

東風吹日花冥冥繁枝壓雪凌風塵素羅衣裳照青春
眼中若有黎園人攀條弄芳畏日夕只令紙上空顏色
顏色好愁轉多與君沽酒花前歌

兵部聽事前枯柏

庭前枯柏生意盡枝葉乾焦根本病黃風白日吹沙塵
鼓動哀音亂人聽嗟哉爾有歲寒姿受命於地獨也正
雨露雖濡心自苦鳳鳥不來誰與盛豈無松檟在山阿
只有蓬蒿没人脛我生愧乏梁棟才浪逐時賢繆從政

清晨騎馬到官舍長日苦饑食還併簿書幸簡不得休
坐對枯槎引孤興人生何為貴適意樹木託根防失性
幾時歸去卧雲林萬壑松風韻笙磬

題西谿圖贈鮮于伯幾

山林忽然在我眼攬袂欲遊嗟已遠長松謾謾含蒼煙
平川茫茫際曾巘大梁繁華天下稀走馬鬪鷄夜忘歸
君獨胡為甘寂寞坐對山水娛清暉西谿先生奇崛士
正可著之巖石裏數間茅屋破不修中有神光發奇字

綠蘋齊葉白芷生送君江南空復情相思萬里不可見
時對此圖雙眼明

題二喬圖

長江東來水滔滔誰謂江廣不容刀中有喬家女兒淚
何意師昏隨二豪龍虎方爭欲相啗鸞鳥鍛翮將安逃
不見當時老諸葛獨聘醜婦何其高

題黃素黃庭後此書飄飄有仙氣意其為楊許
舊跡蓋人間至寶伯幾所藏也

琴心玉文洞玄金鈕朱錦乃汝傳子能得之可長年

黃素縝稟貌且堅橫理如髮約兩邊從有赤道如朱絃
文居其間走玄蛾飛雲卷舒相終始大道甚夷非力使
無為自然有至理誰能精專換骨髓掃除俗塵不瑕穢
目中有神乃識真白玉為軹裝車輪裏以天上翠織成
仙人樓居儼長生鸞鶴翔舞猿猴輕子能寶之慎勿驚
宮室之中夜自明上清真人楊與許焚香清齋接神女
手作此書留下土千年流傳子為主東方蒼龍右白虎

廉不子求貪不與

戲題出洗馬

齧膝更駕誰能御
駑蹇紛紛何足顧
青絲絡首錦障泥
鞭箠空勞怨長路
明窗戲寫乘黃姿
洗刷歸來氣如怒
不須對此苦歎嗟
男兒自昔多徒步

送孟仲則遊荆湖兼往襄漢

行路方難子何往
瀟湘洞庭天一方
長江風來浪如雪
荆門木落天雨霜
千金養客不復見
萬里訪舊庸何傷

子才有用未得試牛刀愛惜藏鋒鋌似聞遠遊未渠央
更欲攬轡趨襄陽昔年戰鬪且休息白骨已瘞愁雲黃
伏龍鳳雛在何處鹿門山色還蒼蒼登高弔古一長嘯
萬事慘澹悲中腸人生聚散安可常為君起舞君舉觴
明朝帆影拂浮玉寄言客居思故鄉

烈婦行

至元七年冬邠州軍士劉平之戍棗陽與其妻胡
俱道宿車下平為虎所得胡起追及之殺虎脫其

夫吾聞之中原賢士大夫如此乃為感激慷慨作
烈婦行以歌之

客車何焯焯夫挽婦為推問君將安去言往棗陽戍官
事有程宿車下夜半可憐遭猛虎夫命懸虎口婦怒髮
指天十步之內血相濺夫難再得虎可前寧與夫死毋
與虎生呼兒取刃力與爭虎死夫活心始平男兒節義
有如許萬歲千秋可以事明主馮婦卞莊安足數嗚呼
猛虎逢尚可寧成寧成奈何汝

送高仁卿還湖州

昔年東吳望幽燕長路北走如登天捉來官府竟何補
還望故鄉心惘然江南冬暖花亂發朔方苦寒氣又偏
木皮三寸冰六尺面頰欲烈凍折弦盧溝強弩射不過
騎馬徑度不用舡宦遊遠客非所習狐貉不具綈袍穿
京師宜富不宜薄青衫駿馬爭騰騫南隣吹笙厭梁肉
北里鼓瑟羅姝妍淒涼朝士有何意瘦童羸馬鷄鳴前
太倉粟陳未易糴中都俸薄難裹纒邇來方士頗向用

讀書不若燒丹鉛故人聞之應見笑如此不歸殊可憐
長林豐草我所愛羈勒未脫無由緣高侯遠來肯顧我
裏茗抱被來同眠青燈耿耿照土屋白酒薄薄無葷羶
破愁為笑出軟語寄書妻孥無一錢江湖浩渺足春水
鳬鴈滅沒橫秋煙何當乞身歸故里圖書堆裏消殘年

贈相士

我昔放浪江湖間舉頭開眼看青山安知世故不相舍
坐受塵土凋朱顏髭須已黃行且白亦知人生不滿百

功名富貴非我事但願有酒呼好客錢唐江邊逢少年
兩眼善相口談天封侯食肉骨法異慎勿置我諸公前
江南春暖水生煙何日投閒茗水邊買經相牛亦不惡
還與老農治廢田

謝鮮于伯幾惠震餘琴云是許旌陽手植桐所
斲

仙人已歸白雲中空餘手植青枝桐根柯盤鬱如蛟龍
一朝霹靂驅雷公烈火半爇隨狂風箕子之裔多髯翁

才氣邁俗驚愚蒙抱持來歸尋國工斲為二琴含商宮
我來自北欣相逢持一贈我為我容自吾得此不敢寐
終夜起坐彈孤鴻下絃清冷上黃鍾轉絃更張涕滿胃
黃虞已遠將無同恨君不識牙與鍾恨我不識瞽與矇
周南大雅當誰從

贈相者

吾聞伯樂善相馬一顧千金長高價何人個儻買權奇
滿眼駑駘居櫪下張君年少目有神走半江湖多閱人

我生瘦悞乏駿骨浪許騰驤防失真連朝春雨今始晴
花枝照眼生春情樓前山色橫翠靄湖上柳黃飛亂鶯
便須沽酒與君飲醉倒花前且高枕懶從唐舉問流年
欲向德翁謀小隱

漁父詞二首

神姬題云人生貴極是王侯浮利
浮名不自由爭得似一扁舟弄月

吟風歸
去休

渺渺煙波一葉舟西風木落五湖秋盟鷗鷺傲王侯管
甚鱸魚不上鉤

儂住東吳震澤洲
烟波日日釣魚舟
山似翠酒如油醉
眼看山百自由

送朱仲陽太平教授

列仙之儒山澤臞
手中黃紙新除書
教官雖冷寔清選
當塗山川如畫圖
我生無能百不如
盍不從君賦歸與
請君為我酌太白
矯首南望心煩紆

題李公略所藏高彥敬夜山圖

高侯胸中有秋月
能照山川盡毫髮
戲拈小筆寫微茫

咫尺分明見吳越樓中美人列仙耀愛之自言天下無
西窗暗雨政愁絕燈前還展夜山圖

贈吳真人

父封饒國公
母饒國夫人

上清真人天上來雲收霧歛天門開手持璽書歸故里
瓊琚玉佩相追陪堂上老仙千歲壽喜兒歸來酌春酒
帝命建爾于上公老仙拜前兒拜後古來子貴父母榮
今見恩榮萃一門紫衣玉帶照華髮金冠瑤簡明朝暉
人間五福誰能備歲晚寒香滿天地真人妙行我所知

曾是玉皇香案吏

題額森特穆爾開府宅壁畫山水歌

大山翠嶺摩青天，小山平遠通雲煙。
商侯胷中有丘壑，信手落筆分清妍。
閨風玄圃元不遠，繁爛金碧流潺湲。
參差澗谷樓觀起，縈紆石路朱橋連。
松風颼颼響虛閣，棋聲剝啄來群仙。
漁歌樵唱渺何許，綸巾羽扇清溪邊。
高情自有泉石趣，涼意不受塵埃纏。
世間書畫亦豈少，誰能真賞如公賢。
華堂風日不到處，絕勝綉幕空高懸。

舉觴酌酒為公壽眼明對此三千年

孤燕曲

燕燕復燕燕孤飛不忍見故雄已作長別離孀雌守節
令人羨昔日雙雙拂烟草十年獨宿梁間藻歎息人間
貞婦少人獨何心不如鳥

題商德符學士桃源春曉

宿雲初散青山濕落紅繽紛溪水急桃花源裏得春多
洞口春烟搖綠蘿綠蘿搖烟掛絕壁飛流淙下三千尺

瑶草離離滿澗阿長松落落凌空碧鷄鳴犬吠自成村
居人至老不相識瀛洲仙客知仙路點染丹青寄輕素
何處有山如此圖移家欲向山中住

秋夜曲

雨聲滴夜清漏長朱簾金幙浮新涼閨中美人動裁剪
故羅衣袂生秋香東鄰剝棗西鄰穫旅館無人念飄泊
餘不潦盡涵清輝芙蓉壓堤怨不歸牆根草綠陰蛾飛
蒲萄架空墮殷玉遙夜露寒生體粟暗蛩棲草鳴不平

無絲經緯空勞促夢魂苦短道苦長萬山深處非吾鄉
玉蟲揺釭螢入屋去雁來魚應可卜醒眼熒熒愁萬斛

孔道輔擊蛇笏

以笏擊蛇有孔公義與段公擊賊同事之鉅細雖有異
正氣憤激生於中偉哉孔公聖人裔豈聽妖邪亂民志
即今槐木一尺強氣象凜凜含風霜子孫守之慎寶藏
絕勝象牙堆滿牀

李氏種德齋詩

一年之計種穀十年之計種木百年種德知何事插架
鱗鱗書滿屋世人責報嗟何速我自無心邀後福日中
為市百賈鬪競逐錐刀蛾赴燭鬻書之利雖云薄要令
舉世沾膏馥為賢為智皆由此耕也未必能干祿他年
種德看成功遠在子孫應可卜

贈張彥古

秋雨新已風日清忽聞剥啄敲門聲出逢麻衣老仙伯
身長七尺雙瞳明平生學道幾半世一見灑灑心為傾

大道無為返爾樸自然有路通長生我今素髮颯以白
宦途久矣思歸耕吳興山水况清絕白雲滿嶺堪怡情
老仙何當從我去小築茅屋依崢嶸還丹已就蓬島近
笑指塵海尋方平

送田師孟知河中府

漢二千石入為相邑令或入為三公聖朝用人亦復爾
予以此賀田河中田侯年少與余友今三十年俱白首
離觴未盡去馬鳴愁向風前折楊柳

趙克敬耘菴

趙子居室名耘菴不以雨暘為旱潦寸田尺宅勤自治
稂莠芟夷嘉穀好平生萬事無助長歲晚所收皆至寶
我託官聯幾一載懷抱於人每傾倒交情雅有古淡風
此意難為輕薄道况我同姓古所敦百世可知宜細攷
三十年來如一夢白髮相看今盡老我方告歸理墓田
莫怪賦詩殊草草

燕脂驄圖歌

騏驎腰褭世常有伯樂不生淹棧豆歛見此圖神自王
權奇磊落龍為友隅目晶熒生紫光錦毛錯落蒙清霜
霜蹄蹴踏寒玉響霧鬣振動秋風涼朝浴扶桑騰浩蕩
莫秣崑崙超象罔雄姿似隘六合小盛氣欲籛浮雲上
嗅塵一歆驚肉飛奮迅不受人間韉豈惟萬馬羞欲死
直與八駿爭先馳只今相者多舉肥歎息此圖誰復知
君不見王處冲半生隱德真成癡

贈捏古伯

有僧有僧住江心以色殺人凶且淫貪官若吏私其金
滅跡鉅海無由尋安知冤魂痛不釋群然號訴衆所覲
盡誅凶儔冤始白誰其白之捏古伯

送高郎仲德往汝州迎母

高郎八歲失其母每一言之淚如雨忽然有信自北來
知道慈親在臨汝艱難一別四十年驚喜失聲渾欲舞
水行有舟陸有車襆被即行身欲羽遙想團欒再拜時
膝下抱持喧笑語人生天地誰無母此別真如隔今古

焉知孝感動神明萬里言歸復相聚吳興山水清且遠
指日安輿還樂土我當理舟楫迎汝買紅纏酒封肥粳
斑衣喜色映庭萱白髮從教老農圃

次韻葉公右丞紀夢

倦遊客子何時去屢欲言歸天未許故鄉樂事時上心
破浪長魚日登俎一蓑一笠得自由某水某丘猶可數
前年有詔舉逸民一旦馳驛登天府豈知佐理自有才
勉強盡瘁終無補青春憔悴過花鳥白日勾稽困文簿

栖栖顏汗逐英俊往往笑談來訕侮倦僕思歸語見侵
瘦馬長饑骨相拄天生我公出瑞世輔相明時期復古
好將圖畫上凌烟未遂衣冠掛神武髭須半白稱貂蟬
步履漸輕宜印組道長自覺小人消亂沮政須君子怒
得閑有兆天與祥吉夢初回月當戶因公此意乞歸田
不辭歌詩為公舞

楊天瑞府判平冤詩

至元年間歲辛卯建寧總管有馬謀間因盜起建陽縣

欲引鎮軍肆誅屠聞民張氏有女子小名月娘美且姝
思得此女恣淫洩乃誣張氏與賊俱月娘逃匿不可得
旁及鄰女遭姦汙既得月娘欲滅口父母親戚皆囚俘
一家九人一時斃痛入骨髓天難呼其餘五人亦瀕死
身被榜掠無完膚人家不幸產无物破家滅族真無辜
楊侯天瑞為府判深疑此事皆虛誕奮髯仗義以死爭
力謂馬謀當併按月娘得脫為良人待盡殘囚出獄狂
沉寃極枉一旦伸臺省交章同論薦聖神天子甚明察

詔下天門發英斷馬謀竟以罪伏誅行路聞之亦咨歎
邑人為侯生立祠牲酒繽紛勤荐裸楊侯平反世希有
宜有陞遷示旌勸政事固因才德美歲月難將資品算即
今已過二十年那拋朱紱換青衫皐夔在位方進賢請為
誦我平冤篇

賦張秋泉真人所藏研山

泰山亦一拳石多勢雄齊魯青巍嵒此石却是小岱岳
峰巒無數生陂陀千巖萬壑來几上中有絕澗橫天河

粵從混沌元氣判自然凝結非鑄磨人間奇物不易得
一見大叫爭摩挲米公平生好奇者大書深刻無差訛
傍有小研天所造仰受筆墨如圓荷我欲為君書道德
但願此石不用鵝巧偷豪奪古來有問君此意當如何

題舜舉摹伯時二馬圖

二龍何時飛上天空有駿影人間傳一匹鳳頭來于闐
一匹賜名花滿川李侯作畫述者錢想見溫公當國年
太平時節巡遊少立仗歸來飽春草老向天閑無戰功

馬自不逢人皤皤

兔

少年馳逐燕齊郊身騎駿馬如騰蛟耳後生風鼻出火
大呼討來飛鳴髀如今老大百憂集拄杖徐行防喘急
卷中見畫眼為明驥聞秋風雙耳立

討來國朝
語謂兔也

贈相師王蒙泉

王君善相多奇中說好誇奇無刺風已將幻化等虛空
問壽幾何持底用遭時乏才偶致位處非其宜常自訟

詞林每媿文字拙玉帶却憐腰體重身歸閭里困衰疾
心戀闕庭形夜夢端如老驥欲倒駿骨雖存難受鞚
清溪如玉遶屋廬箇箇漁舟闕且將閒散樂餘生
豈望殘年給殘俸

松雪齋集卷三

欽定四庫全書薈要卷一萬六千二百八十八

集部

松雪齋集卷四

元 趙孟頫 撰

五言律詩

春寒

夜雨鳴高枕春寒入敝袍時光自花柳吾意豈蓬蒿失
色黃金盡知音白雪高山林隱未得空覺此生勞

雪後同子俊遊何山次韻四首

同是清閒客俱為放浪遊晴山依雪壯野水帶冰流風
急松杉亂年登薺麥收生涯雖未老吾欲覓菟裘

步履行危磴憑闌得妙峰鳥飛迷故道人去想遺蹤掩
冉風前竹支離澗底松山僧飯不足不是忘鳴鍾

兵革時猶動山林日就荒子真思隱遁詹尹卜行藏有
意隨三飯無人饋五漿遠山湖外白立馬見微茫

湍駛波翻雪風生地出雷薄醪隨意盡寒氣逼人來更
欲明朝去何妨迫莫回自憐非李廣醉尉勿相猜

早春

谿上春無賴，清晨坐水亭。
草芽隨意綠，柳眼向人青。
初日收濃霧，微波亂小星。
誰歌采蘋曲，愁絕不堪聽。

重遊弁山

出郭聞鶯語，穿林散馬蹄。
澗松何鬱鬱，春草又萋萋。
白石那堪煮，丹崖尚可梯。
平生愛高興，只合此幽棲。

竹色迷行逕，松聲洶座隅。
水清花自照，風暖鳥相呼。
飲罷思碁局，歌長缺唾壺。
重來瀟灑地，聊足慰須臾。

魚樂樓

樓下南來水清冷百尺深菰蒲終夜響楊柳半谿陰日
月驅人世江湖動客心向來歌舞宴達曉看橫參

秋夜

草蔓行多露蟲聲報早秋明河斜未轉大火已西流欲
作傳杯飲誰能秉燭遊清晨拂鞍馬適野擬消憂

次韻陳無逸中秋月食風雨不見

谿月當圓夜看雲起莫愁曾陰連積水伏雨暗清秋白

壁難容玷明珠不可求每因觀節物轉覺此生浮

獨夜

生事憐吾拙懷人阻道修角聲悲靜夜燈影伴幽憂
水落紅衣老天寒翠袖愁雲中有過雁哀叫亦何求

次韻子山登樓有感

西北高樓好登臨望眼空并山橫雨外笠澤浸天東
計乏千金藥羞看百鍊銅只應將世事都付酒杯中

懷古情何極登危氣尚雄江山一時勝宇宙百年中
翠

袖愁空谷綈袍受朔風超然高舉意決背送飛鴻

聞角

吹角秋風裏邊聲入暮雲抑揚如自訴哀怨不堪聞老
馬行知道孤鴻飛念羣祇今霸陵尉那識舊將軍

次韻馮伯田秋興

搖落故園秋谿山處處幽無錢頻貰酒多病倦登樓文
采陶彭澤丹青顧虎頭誰能混流俗浩蕩一浮漚

風緊草木變露寒沙水清蕭蘭嗟共悴鷓鴣忍先鳴黃

閣非吾事青山不世情
浩歌聊感激裘馬任肥輕
興逐秋風發愁隨秋夜長
繫書陽鳥遠促織候蟲忙
世已無劉表家徒有孟光
故衣寒未補發篋動幽香

本齋先生挽詩

昔我先君子交遊半老儒
詞林宗匠在制閫輔臣須
晚節風塵際閑居歲月徂
謬稱詩賦善深痛典型無

德邵龜齡邁神全鶴髮春
管寧安早帽龔勝謝蒲輪
小楷名空在遺言意更親
平生知己恨淚落雲溪濱

公為孟頫

作研銘嘗刻之研底又臨
終呼孟頫多所囑故云

贈權季玉兼簡李順甫

幕府文書靜湖山春事多風煙歸逸興花鳥助高歌自
愧諸生後其如二妙何卜鄰應有日退食數相過

奉和帥初兄將歸見簡

戴子文章伯不為時所知朱絃非衆聽白壁易羣疑海
樹生秋早江船度越遲莫愁千里別要作百年期

我坐幽憂疾非君誰與娛清談忘日夜高論到唐虞天

地無青眼江湖有白須客居寧鬱鬱歸興託尊鱸

送楊幼澄教授歸江西兼寄吳幼清

客裏相從久愁中欲別難此行登仕版未覺負儒冠北
度憐江總東歸憶幼安著書應滿屋妙處共誰看

送李清甫由御史出按四川

蜀道青天上繡衣駟馬行霜威御史府春色錦官城萬
里平反報三年菽水清相逢一杯酒似為別離傾

送劉伯常淮東都事

久客倦遊甚思歸勞寸心之子復南邁欲別惜光陰蕭
條楚山遠渺瀰淮水深夢中不可到何用解愁襟

晉公子奔狄圖邀端父御史同賦

杌隍居蒲日艱難奔狄時天方興伯者數子實從之歲
久丹青暗人賢簡冊悲至今綿上路猶憶介之推

題朱元暉山水

卧遊渺萬里楚天清曉秋初日江上出白雲山際浮蒼
蒼迷煙樹隱約見孤舟丹青不可作思子徒離憂

送張仲實還杭州

張子早英發，哦詩遺垢氛。
瘦骨映秋水，青眼視晴雲。
黃公酒壚側，王令為書裙。
相望苦不遠，何用惜離分。

食粥

杲杲西流日，滔滔東逝波。
春光薊丘晚，柳色上林多。
不道含香賤，其如食粥何。
明時無小補，郎署漫蹉跎。

酬衛處士見贈

之子有道氣，山居詩興多。
琴清鶴自舞，林靜鳥能歌。
未

遂移家隱深塹輟棹過他年從杖屨養壽向巖阿

送吳禮部奉旨詣彭湖

為國建長策此行非偶然止戈方見武入海不求仙
朱紱為郎日金符出使年早歸承聖渥圖像上凌煙

大司農侯公挽詩

理學推高第清朝位列卿政聲先日著經術莫年精乍
識俄離逝方閑遽隕傾重為天下惜涕淚落縱橫

和周景遠見寄二首

四海多兄弟交情子獨親方將尋舴艋何意畫麒麟
薄領淹豪士江湖著散人相看俱老大喜見二毛新
止酒陶彭澤能書王右軍逃禪寧避俗感舊惜離羣
澤國茫茫水霜空黯黯雲為農投老去北望隱思君

奉隆福召命赴都過德清別業

驟暄氣候變幽園卉物淒山雲石上起春鳥雨中啼
牽衣憐稚子舉案愧山妻苦被虛名累未得遂高樓

謝日林贈湖石次其韻

怪石曾聽法來從不二門玲瓏浮磬韻斑駁古苔痕池
月巖邊上春雲水面屯微爾能輒贈此意向誰論
筇竹杖贈天聖長老仁公仁有詩次其韻

瘦節蒼骨聳臙膚黃玉溫苔間時卓地月下屢敲門持
贈松廬老攜尋水竹邨歸來倚空壁夜氣與俱存

胡穆仲先生挽詩

我有三益友對之如古人布衣甘陋巷書冊老遺民淚
落黔婁被神傷郭泰巾請為千字誄書刻上堅珉

贈永清曹顯祖縣尹

赤縣郎官宰清朝學士班雲端雙履去花底一壺閒鴻鵠宜天路騏驎近帝閑會當從此召豈待及瓜還

贈鄭之僑

我有故人子少年能綴文偏工吟九日已解賦凌雲落
落駒千里昂昂鶴出羣却憐吾老矣須鬢白紛紛

來鶴亭

在杭州開元宮吾往年遊宮中而適有鶴來因為書二字以名亭

客遊真館日鶴來玄圃時援筆二大字欣然千載期長

鳴松月照屢舞竹風吹天路何寥廓吾與爾同之

大都遇平江龍興寺僧閒上座話唐綦母潛宿
龍興寺詩因次其韻

聞說龍興寺多年未款扉風林發松籟雨砌長苔衣殿
古燈光定房深磬韻微秋風動歸興一錫向空飛

李太白酒樓

在任城今
新濟州是

城迴當平野樓高屬暮陰謫仙何俊逸此地昔登臨慷
慨空懷古徘徊獨賞心嶧山明望眼百里見遙岑

送翟伯玉雲南省都事

萬里雲南路青山落照邊省郎新紫綬幕府舊紅蓮見
面嗟吾晚觀文覺子賢只應清淑氣不受瘴溪煙

題趙敬父侍御祖德詩

棄子抱兄子古來聞鄧攸賢哉趙氏母盛德邁前修陰
隲理須復高門慶自流詵詵庭下玉簪笏盡公侯

獲周豐鼎見博古圖第三卷銘六字

豐鼎制特小周人風故淳摩挲玉質潤拂拭翠光勻鑄

法觀來妙銘文考更真平生篤好古對此興彌新

贈劉節軒侍御

驄馬人皆避沙鷗意獨閒天恩霑贈典泉壤慰慈顏樂
在簞瓢外春生杖履間聞閒且行樂但恐趣朝班

雨

撼撼衆葉響滋滋生意新知誰實揮洒解使盡圓勻蛛
網懸珠絡荷盤瀉汞銀喜涼生枕簟愁潤逼衣巾

寄題陸振之與閒堂

一閒天所與萬事世從疎名教有樂地安心為廣居林
間聽啼鳥濠上看遊魚意適無餘想時還讀我書

次韻觀復表兄見簡

寒雨何時已停雲不肯開難陪山簡醉空憶謫仙才梅
蕊枝枝發幽禽日日來可能無過我真復要詩催

載酒無人到山齋晝掩門泥深妨步履雨暗只空邨每
憶文園渴難忘北海尊何當來就飲聽我撫桐孫

故兩浙運使李公挽詩

昔我閒居日公來作守時
敝廬曾寓止暇日每娛嬉
篆籀傳書法絃歌送酒卮
情親自茲始歲晚辱深知
白髮儀刑老清朝侍從班
理財羞聚斂治郡已惘惘
卧疾留南久招魂竟北還
向來漳水道淚落郭西山

五言排律

送張夢符郎中還朝

侍從班行近咨謀出使頻
乘輶山水國把酒浙江春
驄馬歌仍在祥麟德自馴
大書真有法妙句不無神
愛士

容疎放忘羊接隱淪回轅瞻斗極聽履上星辰此別真
堪惜茲情未易陳數公如見問為說混風塵

送董參政赴召

丹極飛明詔鋒車召老臣仲舒經術邃賈誼讜言陳偃
草懷殊俗安田慰遠人公心如皦日江國自熙春散亂
堆牀帙蕭颼滿案塵詭隨吾不忍高卧理還伸入奏能
回主當言莫愛身衮衣瞻望重大席侍趨頻鉛槧工無
益樵漁意已親白鷗波萬里浩蕩未能馴

投贈刑部尚書布呼密公

胄子何多士明公特妙年詩書師法在簪紱相門傳曳履星辰上分光日月邊帝心知俊彥羣望屬英賢大木明堂器朱絲清廟絃吉人詞自寡君子德為先斷獄陰功厚優儒禮數偏我非天下士人謂地行仙山好雙游屐溪清一釣船賦詩時遣興好客恨無錢政爾韋編絕俄聞束帛箋風塵驅驛騎霜雪灑鞍韉別婦經春夏離鄉整四千家書愁展讀旅食困憂煎郎位蒙超擢官曹

幸接聯屢聞哦鄙句信或有前緣知己誠難遇捫心益
自憐樊中淹澤雉春晚怨啼鵲驥病思豐草鴻冥羨遠
天仁言如借便白首向林泉

送瓜爾佳公分省陝西

憶從長楊獵於時始識公堂堂九尺幹落落萬夫雄補
袞彌縫密能書點畫工勞謙延士類豈弟到兒童黃閣
歸人望青雲有父風驅馳常扈從奏對每留中暫輟尚
書履榮分陝右弓秦山依畫錦燕雪感秋蓬粉署趨承

舊瀛洲忝竊同因公動鄉思飛夢過江東

秋日即事

今日秋色好天高景不暄清飈動林薄涼意滿丘樊俗
客無因至幽禽時自言露濃金盞側香遠玉簪繁誰辦
東山妓空餘北海尊莫吟招隱賦桂樹可攀援

元日朝賀

兵曹
時作

閭闔曙先生觚稜瑞靄橫治朝春有象嚴蹕物無聲簪
笏千官列簫韶九奏成形墀簇仙仗翠樹拂霓旌絕域

梯航至來庭玉帛盈皇圖天遠大聖德日高明兵息知
仁布民熙見化行耄倪齊鼓舞率土共升平

奉贈平章李相公十韻

魚水千年慶龍雲億載春乾元開泰運聖主得賢臣畫
像丹青炳書題刻畫真春宮承寵舊秋谷賜名新扶日
登皇極經邦贊化鈞甘盤基相業傳說應星辰報國非
私已逢時豈愛身誰能動天子今復見山人始白詩書
效行看俗化淳願陳歸美意作誦比烝民

題楊司農宅劉伯熙畫山水圖

移得山川勝坐來煙霧空窗中列遠岫堂上見青楓巖
樹參差綠林花掩冉紅鳥飛天路迴人去野橋通村晚
留遲日樓高納快風琴尊會仙侶几杖從兒童疑聽孫
登嘯將無顧愷同微茫看不足瀟灑興難窮碧瓦開蓮
宇丹樓聳竹宮亂泉鳴石上孤嶼出江中藉甚丹青譽
益知書畫功煩渠添釣艇著我一漁翁

七言律詩

和姚子敬秋懷五首

銅爵春深漢苑空
邯鄲月冷照秦宮
烟花樓閣西風裏
錦繡湖山落照中
河水南來非禹跡
冀方北去有唐風
溪城秋色催遲莫
愁對黃雲沒斷鴻

落日孤城動鼓鞶
愁中畫角不勝吹
山川蕭瑟秋雲淨
草木凋傷暮雨悲
多病馬卿聊假日
數奇李廣不逢時
卷簾白水青山裏
隱几無言有所思

搔首風塵雙短鬢
側身天地一儒冠
中原人物思王猛

江左功名愧謝安
苜蓿秋高戎馬健
江湖日短白鷗寒
金尊綠酒無錢共
安得愁中却暫歡

吳宮烟冷水空流
慘澹風雲暗九秋
禾黍故基曾駐輦
芙蓉高閣迴添愁
繡楹錦柱蛟龍泣
金沓瑤階鹿豕遊
宋玉平生最蕭索
欲將九辨賦離憂

野曠天高木葉疎
水清沙白鳥相呼
胡笳處處軍麾滿
鬼哭村村漢月孤
新亭舉目山河異
故國傷神夢寐俱
黃菊欲開人卧病
可憐三徑已荒蕪

聞擣衣

露下碧梧秋滿天
砧聲不斷思綿綿
北來風俗猶存古
南渡衣冠不及前
苜蓿總肥宛騾褭
琵琶曾泣漢嬋娟
人間俯仰成今古
何待他年始惘然

登飛英塔

梯飈直上幾百尺
俯視層空鳥背過
千里湖山秋色淨
萬家煙火夕陽多
魚龍衮衮危舟楫
鴻雁冥冥避罔羅
誰種山中千樹橘
側身東望洞庭波

岳鄂王墓

鄂王墳上草離離
秋日荒涼石獸危
南渡君臣輕社稷
中原父老望旌旗
英雄已死嗟何及
天下中分遂不支
莫向西湖歌此曲
水光山色不勝悲

溪上

溪上東風吹柳花
溪頭春水淨無沙
白鷗自信無機事
玄鳥猶知有歲華
錦纜牙樯非昨夢
鳳笙龍管是誰家
令人苦憶東陵子
擬問田園學種瓜

次韻剛父無逸遊南山作

絕頂清秋凌翠煙登臨應費酒如川平生能著幾兩屐
負郭何須二頃田初日出雲光射地雙溪入湖波接天
升高望遠我所愛青壁有路何當緣

次韻子俊

歲云莫矣役車休蟋蟀在堂增客愁少年風月悲清夜
故國山川入素秋佳菊已開催節物扁舟欲買訪林丘
從今放浪形骸外何處人間有悔尤

次韻本齋先生即事

重攬衣裘敝更寬
徂年欲莫氣先寒
雨中百草難為綠
霜後黃花尚耐看
千古清真耆舊傳
半生辛苦腐儒冠
便應築室山阿去
嘉與斯人賦考槃

次韻信仲晚興

蕭蕭殘照晚當樓
寒葉疎雲亂客愁
歲月蹉跎星北指
乾坤浩蕩水東流
古來人物俱黃土
少日心情在一丘
獨立無言風滿袖
青山相對共悠悠

次韻王時觀

相思吳越動經年一見情深重惘然草木變衰人易老
江湖牢落鴈難前秦山半出青天上禹穴遙臨古道邊
欲說舊遊渾似夢何時重上剡溪船

錢唐懷古

東南都會帝王州三月煙花非舊遊故國金人泣辭漢
當年玉馬去朝周湖山靡靡今猶在江水悠悠只自流
千古興亡盡如此春風麥秀使人愁

次韻舜舉春日感興

沙頭春日已暄妍
細柳新蒲色共鮮
世事底須求分外
人生何物勝尊前
飛花冉冉催華髮
宿草青青失古阡
回首舊歡如夢過
不知今日是何年

紀舊遊

二月江南鶯亂飛
百花滿樹柳依依
落紅無數迷歌扇
嫩綠多情妒舞衣
金鴨焚香川上暝
畫船撸鼓月中歸
如今寂寞東風裏
把酒無言對夕暉

次韻章得一同原父姪遊蘭澤

綠樹閭閻草接天已愁春盡更聞鶉落花飛絮都成恨
痛飲狂歌渾欲顛起舞有人如謝尚著書無意似伶玄
繡筵寶瑟何時會割錦纏頭不計錢

見章得一詩因次其韻

水色清連日色黃梨花淡白柳花香即看時節催人事
更覺春愁惱客腸無酒難供陶令飲從人皆笑酈生狂
城南風暖遊人少自在晴絲百尺長

片片飛花欲送春
萋萋碧草正愁人
黃蜂釀蜜經營急
紫燕銜泥來去頻
才似茂陵非晚遇
美如曲逆不長貧
久知求富都無益
但喜論詩若有神

奉和帥初雨中見贈

陰雨淒淒生夏寒
故人望望惜清歡
停雲底事能相阻
后土何時可得乾
無事甘為犀首飲
切雲聊著屈平冠
閉門客散且高卧
戶外泥深沒馬鞍

正坐清談與世違
交情如子定應稀
圖書跌宕心猶在

裘馬清狂意已非黃鶴未知何日返飢烏故作傍人飛
谿南流水清如玉終擬歸休理釣磯

次韻帥初

吳越相望三十年相逢意氣共翩翩長歌白石徒為爾
遠訪丹砂亦偶然海氣昏昏雲拂地江風颯颯雨連天
他時別後相思處欲問山陰雪夜船

多景樓

層巔官閣幾時修遶檻長江萬古流白露已零秋草綠

斜陽雖好莫雲稠
平南籌策張華得
治內人才葛亮優
景物未窮登覽興
角聲孤起甕城秋

東陽八詠樓

山城秋色淨朝暉
極目登臨未擬歸
羽士曾聞遼鶴語
樓在寶婺觀觀中
老道士能言諸父
出處征人又見塞
鴻飛西流二水玻
瓈

合南去千峰紫翠
圍如此山川良不
惡休文何事不勝
衣

金陵雨花臺遂至故人劉叔亮墓

雨花臺上看晴空萬里風煙入望中人物車書南北混
山川襟帶古今同昆蟲未蟄霜先隕鳳鳥不鳴江自東
綠髮劉伶綠醉死往尋荒塚酹西風

蛾眉亭

天門日湧大江來牛渚風生萬壑哀青眼故人攜酒共
兩眉今日為君開蒼崖直下蛟龍吼白浪橫空鵝鸛迴
南眺青山懷李白沙頭官渡苦相催

時與劉伯宣
尚書同登

海子即事

白水青林引興多，紅裙翠黛奈愁何。
底從莫醉兼朝醉，聊復長歌更短歌。
輕燕受風迎落絮，老魚吹浪動新荷。
餘不溪上扁舟好，何日歸休理釣蓑。

贈周景遠田師孟

與子同客帝王州，一日不見如三秋。
風高氣肅鴈聲急，天晴日暖蛛絲遊。
籬下黃花為誰好，水邊紅樹令人愁。
世間萬事可撥遣，日日痛飲醉即休。

送李元讓赴行臺治書侍御史

粉署聯班僅一秋，旦同趨省莫同休。
豈惟官事奔忙共，自覺吾儕氣味投。
驄馬只今登憲府，白鷗何日傍滄洲。
別離不似今朝惡，南望令人生白頭。

送劉天錫鎮守鄂州

將軍好武更敦書，執戟多年衛帝居。
扈蹕慣騎天育馬，分符真食武昌魚。
弓刀行色寒逾壯，尊酒風流澹有餘。
江路梅花政堪折，未應便向故人疎。

送繆秀才教授真州

髯生別我將安適言向真州作教官但使清風生絳帳
何妨朝日照空槃東園草木因人勝北固江山隔岸看
才近中年已傷別可堪南望送歸鞍

送閻子靜廉訪浙西

翰林華蓋逼青冥憲節乘驄出帝城海內文章歸渾厚
浙西人物望澄清姑蘇落日荷花淨震澤秋風橘柚明
憶向玉階承聖語早歸黃閣慰蒼生

次韻左轄相公

昔年閭里自浮沉，郎省那知遂有今。
老去馮唐堪底用，愁來莊舄向誰吟。
上林柳色春猶淺，西塞桃花水正深。
知己如公居鼎鼐，不應長此泣南音。

次韻左轄相公奉寄行臺中丞徐公

盡日沉迷簿領書，何時重得賦閒居。
已無夢想懸金印，豈有文章到石渠。
白髮故人霜柏在，黃塵遊子斷蓬如。
舊遊憶在吳興日，自採谿毛膾白魚。

送孟君復信州總管

君侯弱冠已專城未許甘終浪得名五馬人生真足貴
一毫寵辱不須驚莫雲去作江東客秋雨無忘薊北情
歌罷風前折楊柳離觴那忍為君傾

追挽宋漢臣副使

生世憐余後此公聞人說似涕無從一時文獻交遊裏
十載烟霞杖屨中有子能為先友記臨終方見古人風
秋漪亭上殘陽色猶照先生醉後容

欽頌世祖皇帝聖德詩

東海西山壯帝居南船北馬聚皇都一時人物從天降
萬里車書自古無秦漢縱強多霸略晉唐雖美乏雄圖
經天緯地規模遠代代神孫仰聖謨

送吳思可總管汀州

七閩南去路崎嶇五馬承恩出帝都地氣喜聞今有雪
民生寧似昔無襦山城酒美傾鸚鵡雨館春深聽鷓鴣
他日相思應悵恨離筵不忍賦驪駒

李仲淵求其弟叔行萬竹亭詩為賦一首

聞君有弟多栽竹邀我題詩寄遠情翠碧飛來人政靜
鳳皇鳴集實初成江波倒影春雲合山月籠陰夜氣清
我亦有亭深竹裏也思歸去聽秋聲

王氏節婦

夫婦人倫之大者夫死寧容有二天矧是簪纓閑姆訓
故應詩禮得家傳何須斷耳徒驚俗只是持身已自賢
年少寡居今白髮為君重賦柏舟篇

和姚子敬韻

同學故人今已稀
重嗟出處寸心違
自知世事都無補
其奈君恩未許歸
滄洲白鳥時時夢
玉帶金魚念念非
準擬明年乞身去
一竿同理舊苔磯

趙子敬御史志養堂

志養堂前驄馬歸
融融喜氣動庭闈
能令將種為書種
可是斑衣勝繡衣
手樹藂萱侵雪色
心同寸草報春暉
不須更上陳情表
壽母康強世所稀

至元庚辰由集賢出知濟南
暫還吳興賦詩書

懷

五年京國誤蒙恩
乍到江南似夢魂
雲影時移半山黑
水痕新漲一溪渾
宦途久有曼容志
婚妻終尋尚子言
政為疎慵無補報
非干高尚慕丘園

多病相如已倦遊
思歸張翰況逢秋
鱸魚蓴菜俱無恙
鴻鴈稻粱非所求
空有丹心依魏闕
又攜十口過齊州
閒身却羨沙頭鷺
飛去飛來百自由

初到濟南

自笑平生少宦情，龍鍾四十二專城。
青山歷歷空懷古，流水泠泠盡著名。
官府簿書何日了，田園歸計有時成。
道逢黃髮驚相問，只恐斯人是伏生。

劉端父御史見和前詩次韻答之

少日居多隱，遯情微官猶喜得。
山城腹中洞視渾，無物身外何因更有名。
忽憶放船苕水去，終期背郭草堂成。
故鄉一別三千里，看見池塘草又生。

次韻端父和鮮于伯幾所寄詩

畫舸西湖到處游別來飛夢到杭州
百年底用憂千歲一日相思似幾秋
苦憶東南多勝事空吟西北有高樓
只今賴有劉公幹時寫新詩解客愁

春日送廉訪監司赴都

春回北斗轉招搖使節迎春上九霄
官道柔楊有生意私田細麥長新苗
東風河水冰初泮遲日沙堤雪易消
入覲彤庭元會畢袞衣留相聖明朝

送劉安道指揮副使還都兼寄李士安學士

昔來雨雪正霏霏今去春鴻向北飛
王事便應歌杖杜家人未用歎蚍蜉
據鞍橫槊軍威壯把酒論文雅志違
為問瀛州李學士相思何故信音稀

趵突泉

灤水發源天下無平地湧出白玉壺
谷虛久恐元氣泄歲旱不愁東海枯
雲霧潤蒸華不注波濤聲震大明湖
時來泉上濯塵土冰雪滿懷清興孤

繼鄭鵬南書懷

豈不懷歸苦未閒宦情羈思不成歡可能治郡如龔遂
只合臨流似幼安棊局懶從先處著醫方留取用時看
夜來夢到苕溪上一枕清風五月寒

驚秋

澤國西風一夜生故園喬木動秋聲山川滿目悲搖落
物色無心得老成下坂牛羊知故道親人魚鳥近幽情
向來豪氣消磨盡空對年光浪自驚

德清閒居

已無新夢到清都空有高情學隱居貧尚典衣貪購畫
病思棄研厭求書圉人焚積夜防虎溪女叩扉朝賣魚
困即枕書飢即飯謀生自笑一何疎

題山堂

手種青松一萬栽山堂留得翠屏隈推窗綠樹排簷入
臨水紅桃對鏡開山雉雖迎朝日去野禽啼傍夕陽來
老妻亦有幽棲意數日遲留不肯回

醉後同張剛父清風樓聯句

碧樹未黃風露秋晚雲蕭索亂山愁趙千家疎雨催碁

杵兩岸殘陽入釣舟張畫角吹殘入罷市清尊飲散客

登樓趙古今迴首俱陳迹唯有谿聲日夜流張

和鄧善之九月雪

季秋驚見燕山雪遠客淹留愁病身顛顚自傷黃菊晚
橫斜空憶野梅春蒼松翠柏爭繁重紺殿紅樓迥絕塵
想得江南猶未冷嫩橙清酒政嘗新

次韻子敬懷王子慶往吳中

王力購
晉帖

闔閭城郭鎮姑蘇弔古登臺百感俱秋水遠隨鴻影沒
江雲長傍客帆孤吳時花草於今在晉代風流絕世無
別後故人須有得已應懷寶問歸途


松雪齋集卷四

謹案卷三二十二頁前二行額森特穆爾舊作也
先帖木兒今改

卷四十一頁後一行布呼密舊作不忽木今改後
倣此

欽定四庫全書





總校官庶吉士臣張能照

校對官編修臣裴謙

謄錄監生臣劉銓瑛